

ODLUKA
O PRIHVATANJU ZADUŽENJA PO SPORAZUMU O KREDITU IZMEĐU
BOSNE I HERCEGOVINE I UNICREDIT BANK AUSTRIA AG ZA
FINANSIRANJE PROJEKTA NABAVKE OPREME I PRUŽANJE
USLUGA ZA DVIJE BOLNICE U SARAJEVU

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07 , 24/09 i 44/10) Predstavnički dom Parlamenta Federacije Bosne i Hercegovine na svojoj sjednici održanoj 19.05.2011.godine i Dom naroda Parlamenta Federacije Bosne i Hercegovine na svojoj sjednici održanoj 16.06.2011. godine d o n o s i

ODLUKU

O PRIHVATANJU ZADUŽENJA PO SPORAZUMU O KREDITU IZMEĐU BOSNE I HERCEGOVINE I UNICREDIT BANK AUSTRIA AG ZA REALIZACIJU PROJEKTA NABAVKE OPREME I PRUŽANJE USLUGA ZA DVIJE BOLNICE U SARAJEVU

I

Prihvata se zaduženje Federacije Bosne i Hercegovine (u daljnjem tekstu: Federacija), po Sporazumu o kreditu između Bosne i Hercegovine i UniCredit bank Austria AG, u iznosu 3.229.012,00 eura, za realizaciju Projekta nabavke opreme i pružanje usluga za dvije bolnice u Sarajevu.

II

Sredstva kredita iz tačke I. ove odluke koristit će se za finansiranje Projekta nabavke opreme i pružanje usluga za dvije bolnice u Sarajevu. Cilj Projekta je nabavka opreme za JU Opća bolnica „Prim. Dr. Abdulah Nakaš“ u iznosu 2.449.491,50 eura i Klinički centar Univerziteta u Sarajevu u iznosu 585.443,50 eura, kao i pružanje usluga kroz trening, edukaciju i servisiranje u iznosu 194.077,00 eura, čime bi se omogućilo kvalitetnije pružanje usluga i postigla veća efikasnost u njihovom obavljanju.

III

Sredstva kredita iz tačke I. ove odluke odobravaju se Federaciji pod sljedećim uvjetima:

- iznos zajma:.....3.229.012,00 eura
- rok otplate:..... 13 godina
- grace period:..... 4 godine
- kamatna stopa:.....0,0 %
- dospjeća:.....polugodišnje, u jednakim otplatama glavnice
- troškovi garancije: 1,129 %
(podržano grantom Ministarstva finansija Austrije u iznosu 232.327,41 eura)
- troškovi upravljanja:0,45% jednokratno
- troškovi za neiskorištena sredstva:0,35% godišnje
(u toku perioda podizanja uz kvartalno plaćanje)

IV

Potvrđuje se da je razmatrana dokumentacija prihvatljiva za Federaciju, a posebno:

- Sporazum o kreditu za finansiranje Projekta nabavke opreme i pružanje usluga za dvije bolnice u Sarajevu između Bosne i Hercegovine koju zastupa Ministarstvo finansija i trezora i UniCredit banke Austria AG;
- Usaglašeni zapisnik sa pregovora.

V

Kreditna sredstva iz tačke I. ove odluke Federacija prenosi na kreditnoj osnovi na Kanton Sarajevo.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI

Zadužuje se Federalno ministarstvo finansija da sa Kantom Sarajevo usaglasi i sklopi odgovarajući Podugovor o kreditu kojim će, u svrhu redovne otplate, definirati uvjete vraćanja sredstava koja se prenose na kreditnoj osnovi.

VII

Daje se saglasnost za zaključivanje Supsidijarnog sporazuma o kreditu između Bosne i Hercegovine i Federacije i Podugovora o kreditu između Federacije i Kantona Sarajevo za kredit iz tačke I. ove odluke.

Za potpisivanje Supsidijarnog sporazuma i odgovarajućeg Podugovora o kreditu ovlašćuje se federalni ministar finansija.

VIII

Za realizaciju ove odluke i izvještavanje zadužuje se Federalno ministarstvo finansija, Ministarstvo finansija Kantona Sarajevo, Ministarstvo zdravstva Kantona Sarajevo, JU Opća bolnica „Prim. Dr. Abdulah Nakaš“ i Klinički centar Univerziteta u Sarajevu, svako u okviru svoje nadležnosti.

IX

Implementacija Sporazuma iz tačke I. ove odluke ne zahtijeva donošenje novih ili izmjenu postojećih zakona.

X

Ova odluka stupa na snagu narednog dana od dana objavljivanja u "Službenim novinama Federacije BiH".

**PREDSJEDAVAJUĆA
DOMA NARODA
PARLAMENTA FEDERACIJE BiH**

Karolina Pavlović

**PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BiH**

Dr. Denis Zvizdić

O B R A Z L O Ž E N J E

Pravni osnov

Pravni osnov za donošenje ove odluke sadržan je u članu 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, br: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrtu kreditnog sporazuma i utvrđivanja **Prijedloga** odluke, istu dostavlja Parlamentu Federacije BiH na usvajanje. Ovakva izmjena zakona imala je za cilj pojednostavljenje procedure u donošenju odluka, tako da će Parlament Federacije BiH na ovaj način usvajati odluku, a ne potvrđivati ranije donesenu odluku Vlade Federacije BiH.

Razlozi za donošenje

Osnovni razlog za donošenje ove odluke je nezadovoljavajuće stanje medicinske opreme u Kliničkom centru Univerziteta u Sarajevu i Općoj bolnici „Prim. Dr. Abdulah Nakaš“.

Projektom je predviđena nabavka opreme za JU Opća bolnica „Prim. Dr. Abdulah Nakaš“ u iznosu 2.449.491,50 eura i Klinički centar Univerziteta u Sarajevu u iznosu 585.443,50 eura, kao i pružanje usluga kroz obuku, edukaciju i servisiranje u iznosu 194.077,00 eura. Sredstva kredita će se usmjeriti za nabavku:

- Višeslojnog CT aparata, mamografa, standardnog stropnog RTG aparata, analizatora za acidobazni status, 3 defibrilatora i sistema za neuronavigaciju za ortopediju za potrebe Opće bolnice „Prim. Dr. Abdulah nakaš“;
- sistema za neuronavigaciju za neurohirurgiju, a za potrebe Kliničkog centra Univerziteta Sarajevo.

Prihvatanjem ovog kredita stvorit će se uvjeti za nabavku neophodne opreme, čime će se omogućiti kvalitetnije pružanje usluga i postizanje veće efikasnosti u njihovom obavljanju, te stvoriti uvjeti za adekvatno zbrinjavanje pacijenata u Kantonu Sarajevo.

Obrazloženje pojedinih tačaka

Tačka I je nužna da bi se prihvatilo zaduženje Federacije BiH kod UniCredit bank Austria AG.

Tačkom II potvrđuje se namjena utroška sredstava kredita.

Tačkom III precizirani su uvjeti kredita.

Tačkom IV potvrđuje se da je dokumentacija parafirana tokom pregovora s Unicredit bankom AG Austria prihvatljiva za Federaciju BiH, što je uvjet da Bosna i Hercegovina i Unicredit banka AG Austria pristupe potpisivanju Sporazuma o kreditu.

Tačkom V se definira način implementacije projekta, te da nije potrebno osigurati dodatna sredstva u Budžetu Federacije za ovu namjenu.

Tačkom VI se definira obaveza Federalnog ministarstva finansija da sa Kantomom Sarajevo usaglasi i sklopi odgovarajući Podugovor o kreditu.

Tačkom VII daje se saglasnost za zaključivanje Supsidijarnog sporazuma o kreditu sa Bosnom i Hercegovinom i daje se ovlaštenje federalnom ministru finansija da ga u ime Federacije potpiše.

Tačkom VIII se definira da se za realizaciju ove odluke i izvještavanje zadužuje Federalno ministarstvo finansija, Ministarstvo finansija Kantona Sarajevo, Ministarstvo zdravstva Kantona Sarajevo, JU Opća bolnica „Prim. Dr Abdulah Nakaš“ i Klinički centar Univerziteta u Sarajevu, svako u okviru svoje nadležnosti.

Tačkom IX se potvrđuje da za implementaciju Sporazuma o kreditu nije potrebno donijeti nove ili izmijeniti postojeće zakone.

Tačkom X propisuje se stupanje na snagu ove odluke.